



**TATA IBADAH  
PARTONGGOAN RUMAH TANGGA GKPS PADANG BULAN  
MODEL C**

Tata Ibadah: <http://www.gkpspadangbulan.com/tatib>



**Parambilan:** Pdt. Masria Girsang, M.Th.; **Paragenda:** St. Andreas Sinaga,  
**Doding:** St. Alven Saragih; **Tonggo Syafaat:** St. Surya Sembiring,  
**Panorang:** Jumat, 10 Juli 2020

**1. VOTUM-INTROITUS-TONGGO**

**P :** Ibagas goranni Naibata bapa pakon Tuhan Jesus Kristus ampa Tonduy Napansing, Sitompa langit pakon tanoh on. Amen. *"Hata-Mu do rigapan bani naheihu, anjaha panondang bani dalanku."* Halleluya.

**Martonggo ma hita!** Ham Tuhan Jesus bona ni malas ni uhur, pasu-pasu ampa hagoluhan. Pujionnami do Ham bani panorang on, halani iojur janah ipargogohi Ham do hanami gabe tarbahren hanami marhasadaon rap pakon Ham ampa hasoman nami. Sai maidop ma uhur-Mu mangidah hanami, jalo Ham ma parsombahon ampa pamujion nami on. Amen.

**2. MANDODING Hal . 304. Sada Goran na Majenges ( 1+2)**

1. Sada goran na majenges humbai ganup goran in Goran ni Tuhanta Jesus in do sijengesan in Goran-Mu o Tuhan sai dodingkononku in Goran-Mu Jesuskin na pamalum uhurhin

2. Sai na malum do uhurhu, domma sonang tonduyhin Goran-Mu, do sinajatanku, maralohon munsuhkin Goran-Mu, O Tuhan sai dodingkononku in Goran-Mu, Jesuskin na pamalum uhurkin

**3. Tonggo Syafaat**

**4. MANDODING Hal. 448. Mantin Ni In do Hape (1+2 )**

1. Mantin ni in do hape, padan ni Tuhan Jesus Pamalas uhur tene, bai ganup na tinobus Dear tumang padan-Nin, na gabe sijoloman Patoguh uhur do in bai na marpangarapan Sai hagolukon ma in baen rudang hajengeson Ase sonang ham ijin gok Tonduy Hasintongan Hinalayak-Ni do in pasirsir haluahon Janah damei uhurmin jumpahan hagoluhan

2. Sai jalo Ham Tuhan in na gabe Siparmahan Baen hatengeran do in ronsi na ondos padan Seng habiaran be in pori aha na masa Ai seng ijin ujungnin, goluh ni na porsaya Sai hagolukon ma in baen rudang hajengeson Ase sonang ham ijin gok Tonduy Hasintongan Hinalayak-Ni do in pasirsir haluahon Janah damei uhurmin jumpahan hagoluhan

**5. Ambilan: Podah 4: 1-9 (Diskusi)**

**6. Mandoding Halleluya No. 411. Diatei Tupa ma Bamu Ham Naibata (1 - 2) ( Patumpu galangan)**

1. Diatei tupa ma bamu Ham Naibata, mambaen tupa humpulannami on Igomgom Ham do horja nami on torsa, gok malas uhur do hanai ijon Ibere Ham do damei na tarsulur, sanggah manranggi horja haganup Nuan hanami rap marmalas uhur, mardingat haganup pambaenan-Mu

2. Ipardimata Ham do tong hanai on Tuhan, ai sorap do Tonduy-Mu in tongtong Ase torsa mardalan horja ganupan, Kuasa-Mu do in mambaen sintong Porini dong rundut ni paruhuran, sirsir do Ham manohu hanai on Ai hata-Mu do tong na pagolpohon, mambaen tapang nuan ganup ijon

## **7. TONGGO GALANGAN – PANUTUP – PASU PASU**

**P.** Martonggo ma hita mangondoskon galanganta hubani Naibata:

Ham Tuhan Naibata Bapanami na i nagori atas. Tarimakasih ampa puji-pujian ma isombahkon hanami hu Bamu. Domma ijalo hanami hata-Mu na pinadasni juak-juak-Mu. Pargogohi Ham ma hanami mandalankon in bani goluh nami siganup ari. Bani panorang on iondoskon hanami ma dirinami pakon pasu-pasu na dob binere-Mu bannami, na gabe galangan hatarimakasihonnami hu Bamu. Sai jalo anjaha pasu-pasu Ham ma galangannami on, laho pabolaghon harajaon-Mu pakon pararatkon hata-Mu i dunia on, na gabe hasangapon-Mu, ibagas goran ni Anak-Mu Tuhan Jesus Kristus Tuhannami. Amen.

**P.** Riap ma hita martonggo marhitei tonggo na niajarhon ni Tuhan Jesus hubanta:

Ham Bapanami na i nagori atas. Sai na papansing ma goran-Mu. Sai roh ma harajaon-Mu. Sai saud ma harusuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap ham ma dousa nami songon panasap nami bani dosa ni hasoman na mardousa dampak hanami. Ulang hanami bobai Ham hu parlajouan. Paluah Ham ma hanami humbani pangagou. Ai Ham do simada harajaon, pakon hagogohon, ampa hasangapon sadokah ni dokahni. Amen.

**P.** Jalo hita ma pasu-pasu humbani Tuhan Naibatanta:

Idop ni uhurni Tuhanta Jesus Kristus, Pakon holong ni atei ni Naibata Bapa, ampa parsauran ni Tonduy Na Pansing ma mangkasomani hita haganupan. Amen.